

Vizyon

Donn Seselwa zot lakaz!

Lep ep Seselwa i eksprim gran mekontantman avek lafason ki SPPF pe zwe politik avek lakaz. Sa ki nou pa konpran se aköz gouvènmman pa oule donn bann lakaz ki'n fini avek bann fanmiy ki pli dan bezwen? Tou le 25 distrik dan Sesel i annan gran lalis demann. Plizyer fanmiy i dan difikilte. Serten paran i bezwen dormi dan menm lasanm avek zot zenn garson ek fiy adolesan. Lezot fanmiy i fer salon vin lasanm aswar, e lezot i reste dan lakaz kot letan lapli i tonbe, tol i koule parey en ponn larozwar. Aköz alor gouvènmman SPPF dirize par Jj ki sipoze montre konpasyon pour lepep i pa donn fanmiy Seselwa lakaz?

Lakaz pa bon pour Seselwa?

Lepep pe demande ki mannyer bann zenn ki sorti partou Moris, La Reunion ek lezot landrwa in kapab vini e reste dan bann lakaz Perseverans, tandis ki bann Seselwa ordiner i

bezwen kontinyen vey dan gob. Eski SPPF pe dir nou ki sa bann lakaz pa ase bon pour Seselwa? Oubyen eski parey zot labitud, SPPF pe zwe politik avek lakaz?

Donn lakaz pa en faver!

SPPF i oule fer Seselwa krwar ki se en faver ki gouvènmman pe fer letan i konstri lakaz. Konstriksyon lozman konvenab pour en pep pa lenvansyon Myse Rene avek SPPF sa! Tou gouvènmman dan lemond i fer li aköz i zot responsabilite. Apre tou se lepep ki donn koudmen repeye ler zot in pret larzan pou bann tel proze. E menm apre, sa ki bezwen sa bann lakaz pa ganny pou naryen.

SPPF fodre aret zwe politik lakaz

SNP i demande ki gouvènmman i aret zwe politik avek size lakaz e ki i donn sa ki dan bezwen bann lakaz ki'n pare lo Zil Perseverans deswit. Fodre ki Seselwa i konpran tre byen ki malgre bann lakaz in pare Jj i oule servi sa bann lakaz koman dimyel pou ganny vot an 2011. E byensir antre tan i pou

fer dimoun viv dan lafreyer zis pou servi sa koman en labwet. Seselwa, SNP i kler lo sa size lakaz: Fodre ki SPPF i aret zwe politik avek en keksoz ki tou fanmiy i bezwen. Letan zot fer sa, zot montre klerman ki zot pa enterese avek Seselwa, me plito avek zot vot e sa ki zot kapab gannyen.

Donn dimoun dapre zot bezwen!

Nou osi oule war gouvènmman vin pli transparan kot size lakaz i konsernen. Pou tro lontan biro Ladministrasyon Distrik pe servi lakaz konman en zouti politik pou aste vot pour SPPF e viktimiz siporter lopoizisyon. Si i vre ki Jj i annan 'en leker pour tou Seselwa' parey in dir, enn fwa pour tou i merit met lord dan sa size lakaz e donn bann ki pli bezwen enn la komela menm, olye esper ziska 2011. Fanmiy ki dan plis bezwen i devret ganny zot lakaz selon zot nesesite. Politik napa plas dan donn dimoun lakaz. Nou tou nou imen apre tou, pa zis SPPF.

Fodre pri Benzin ek Dyez el i desann

Depi lannen pase, Seselwa in war pri benzin ek dyez el ogmant par plis ki 100%. Gouvènmman ti anvoy Kaptenn Adam eksplik rezon deryer sa bann logmantasyon. Nou admir Kaptenn Adam aköz li i sel dimoun dan gouvènmman ki'n dir ouvertman roupi in devalye.

Rezon pour logmantasyon ti ganny donnen an-relasyon avek logmantasyon dan pri karbiran lo marse mondyal. Karbiran ti'n sorti 100 dolar en barik pou arik pre 200 dolar. Me ozordi karbiran in desann e i 116 dolar en barik. Eski Gouvènmman SPPF dirize par Jj pou aksepte fer desann pri lo laponmp e fer li vin R10 en lit parey i devret ete?

Le 1 Septanm Seselwa pou ganny en bon lendikasyon ki mannyer sa Gouvènmman i malonnet. Zot pou vin donn nou tou kalite

leskiz e probableman zot pou ogmant pri sa komodite ankor. Nou annan zis ankor detrwa zour pou espere e war pour nou menm.

Laverite se ki Gouvènmman SPPF i kontan anbet dimoun. I malere pou dir, me zot anbet

plis sa bann menm dimoun ki pare pou met triko leker dan leker, e apre konplent plis. SPPF pa pou zanmen anbet nou dan SNP. Nou war tou zot bann bat latet.

Seselwa, karbiran in desann lo marse mondyal. Alor pri isi Sesel osi i devret desann. I pa devret annan okenn zistwar.

Konvansyon Madanm

SNP i enform tou madanm ki konvansyon madanm pou fer

Dimans le 7 Septanm kot

Sant Konferans Enternasyonal

aparti **3er apremidi**.

Gran prometer, pti donner!

Ekout parol Mr. James Michel, mye konni koman Jj dan son manifesto pour eleksyon 2006: 'Ou anvi form parti sa lekip sanpyon. Ou krwar ki ler in arive pour ou avek Sesel mont pli o, al pli lwen, atenn nouvo bi, bouze e fer sikse dan ou pei.' Se sa dimyel ki sa imsyte ti pas lo lalev Seselwa, e i ti ganny eleksyon.

Poz ou lekor kestyon

Eski onnetman ou kapab dir ki depi sa 2an ki ou'n fer li konfyans e elekte li, ou war ki ou lavi ek sa ki pour ou zanf an vin meyer? Eski ou pe ganny en meyer rannman finansyel? Eski aprezan ou annan plis larzan dan ou pos? Seselwa, nou konnen ki larepons tou sa kestyon i **NON**. Rezon pour sa i senp. Prezidan Michel pa pe onor okenn sa bann promes ki i ti fer. I ti fer li zis pou ganny eleksyon. I pa senser.

Sitiasyon pe detoryore anba Jj

Ziska prezan anba son direksyon, lavi pa'n vin pli konfortab e personn pa pe akonpli zot rev ek lanbisyon. Nou roupi in devalye par plis ki 65%, tou later pe ganny vann avek etranze, pri manze in mont par plis ki 100%, plizyer santenn profesyonnel in perdi zot travay oubyen pe kit pei, Sesel pe bezwen pret larzan pou enport karbiran, nou pe ganny difikilte pou repey nou det eksteryer e repitasyon nou pei lo marse finansyel enternasyonal in degrade. Jj in bite!

Oli solisyon ki Jj ti promet?

Apre tou sa letan ki in dan gouvrenman depi kou deta, i kler ki Jj napa nanryen nouvo pou ofer. In fer en gran promes atraver son langazman pou donn Seselwa 'en bon dil.' Me oli solisyon pour tou sa difikilte ki lepep

pe fer fas avek? Nou pe war plis krim, trafik drog, mank lanpwa e napa foreks. Mr. Michel pa enterese avek Seselwa, me avek proze tel ki Fondasyon Jj Spirit ek Liniversite Sesel, zis pour ki son non i ganny mete lo bann plak louvertir. Eski sa solisyon pour pei? Eski sa i met manze dan vant Seselwa?

Lavenir i avek SNP

Sesel i bezwen nouvo direksyon. I bezwen en gouvrenman ki onnet, ki pou permet ou konnen ki pe pase dan ou pei. Ou sipor pou SNP dan prosen eleksyon pou ede anmenn sa sanzman neser ki Sesel i bezwen. En gouvrenman dirize par SNP pou kree en klima politik kot i annan plis transparans, distribisyon egal dan larises pei e lalwa pou pli drwat e zis. Anba SNP ou pa pou ganny zis promes, me ou pou kapab debourye e fer progre senpleman akoz ou en Seselwa.

Oli rezilta lenvestisman?

Avek nou sitiasyon ekonomik ki pe kontinyen detoryore, lepep pe rode oli rezilta tou sa investisman ki gouvrenman pe koz labous plen lo la? Si vre sa bann lenvestisman ti pe anmenn reveni pou Sesel, akoz ki i annan en mank foreks?

Lakantite touris ki vizit Sesel sak lannen pe ogmante, me sitiasyon deviz pa sanze. Alor akoz nou pti Sesel i kontinyen war li de zour an zour dan plis difikilte?

Nou kwar sa ki nou gannyen Sesel i ase pour nou tou partaze. Me malerezman zis serten ki annan gran privelez. I annan zis en serten kategori lanperer dan nou pei, e se zot sa bann gro reken ki annan tou e manz tou. Anba SNP, nou tou nou pou menm grander!

SPPF pe zve avek vant Seselwa

Dan Sesel ozordi se size pri lavi ki topik tou konversasyon. Sak fanmiy i vwar zot tre okipe avek ki manyer pou fer de bout zwenn. Sitiasyon ekonomik aktyel i enn tre delika : devaliasyon roupi, logmantasyon dan pri petrol, sitiasyon black market e pri komodite ki pe monte, tousala pe anmenn lafreyer ki lamizer pe tap lo bokou laport Sesel.

Lepep i dezapwente akoz SPPF pe kit zot tousel ek zot traka e dan zot difikilte. Ki deryen fwa oun antann Prezidan Michel koz lo size pri la ? Ouswa ou vwar li zis pe monte desann, pou al regard zve Olenpik e al miting SADC zis pou li vwar Mugabe ! Apre 2an ki lepep in elekte Jj, ozordi nou pa pe vwar sa 'lavi ki meyer pour ou avek ou zanf an,' ki i ti

promet.

Dan lespas lan apre eleksyon zot swadizan 'Lasanble Serye,' fodre ou realize ki pri lavi in ogmant par plis ki 100%, san ki okenn MNA SPPF in annan kouraz pou eksprim soufrans sa ki'n elekte zot e dir avek gouvrenman 'enough is enough !

Dan sa letan Seselwa in war **DIRI** (pake ver) sorti **R9** pou vin **R21.50**, **BWAT BEF** sorti **R12** pou vin **R25**, **LANTIY** sorti **R9** pou vin **R48**, **DELWIL** sorti **R12** pou vin **R42**! Pa oubliye ki **DELO** avek **ELEKTRISITE**, de neserite enportan dan preparasyon nouritir e dan nou lavi tou lezour in osi double pandan sa menm letan. Pa sanmenm ki ou apel SPPF pe zve avek nou vant? Ouver nou lizye Seselwa! Ziska kan nou pou viv dan fernwanr?

PAS PARTOU

Fann 'People' dan kaso!

SPPF i araze vey tou zaksyon dimoun, me selman sa ki pour zot, zot pa rakonte. Akoz Ralph Agrippine pa rakont nou ki gro fann People ti pas en lannwit dan kaso apre ki i ti vin fer bay kot 'Barrel'? Olye ferm bal, kaso ki ti ferm li! Dominer in zwenn bay!

Aksidan MNA

Akoz Agrippine pa osi rakont nou ki manyer sa MNA SPPF ti bite e apre demande oli son boutey? Eski i pa ti war sa gro poto? Oubyen i ti anvi danse? Sa wa dir nou!

Youth Fun Walk

SNP pe organiz en 'Youth Fun Walk' **Dimans le 14 Septanm aparti 9am. Sa lamars pou komans Danzilles, Bel Ombre ziska Anse Mazor. Tou zenn i ganny envite pou partisipe.**

1418

Read the SNP Youth e-newsletter '1418' :
www.snpseychelles.sc/1418.htm
Youth for a better future

SNP Lottery

WIN WITH THE SNP !

PRIZES

- 1st : Family holiday : Four return tickets to Mauritius + 7 days accommodation on BB
- 2nd : Two return tickets to Singapore
- 3rd : Two nights HB at La Reserve Hotel, Praslin
- 4th : Two nights BB at L'Archipel Hotel, Praslin
- 5th : SR5000 cash
- 6th : SR5000 cash
- 7th : One washing machine
- 8th : One refrigerator
- 9th : One TV set
- 10th : One DVD player
- 11th : One Guitar
- 12th-20th : Consolation prizes

R10/-

Draw on December 20, 2008

NOU PA POU ZANMEN LES TONBE!